

Posibel Banana Shimaron di Aruba localisa den mondi



ORANJESTAD (AAN)

Recientemente Departamento di Agricultura, Cria y Pesca (DLVV) a localisa un *Myrmecophila humboldtii*, mihor conocir como Banana Shimaron, y ta den proceso pa verifica si ta trata di un caso unda cu e mata a wordo planta dor di

un individuo of si esaki ta crece riba su mes den nos naturalesa.

Na 2002 cu aprobacion di DLVV tabata tin un intento pa reestablece e orquidea cu un rasa cu lo por a bin di ehemplarnan cu hende a yega di coy for di mondi. Actualmente ta asina cu

Arnoldo's Zakflora, Wat in het wild groeit en bloeit op Aruba, Bonaire en Curaçao, 4^{de} geheel herziene editie, A.S.J. van Proosdij, 2012 ta bisa cu e orquidea ta, *inmiddels verdwenen*, indicando cu esaki a desaparece for di e mondinan na Aruba.

Pa evalua si e ehemplar haya ta natural DLVV a informa si e lugar unda a hay'e tabata uno cu por a cay den e intento di 2002, cual a resulta di no ta e caso. Sin embargo e sitio ta uno unda cu hopi hende ta recrea, pues no por descarta cu por ta trata di un intent di reforestacion di un individuo singular. Mescos tabata e caso na aña 2011 unda cu individuonan a pega un orquidea cu label di comercio ariba un Watapana den mondi.

Siguientemente DLVV a observa e substrato cu e ta crece ariba. Por ehempel pa e intento di reforesta cu a practica den aña 2002 DLVV a comprende cu hendenan a peganan ariba otro matanan manera Cadushi cu ta mas facil pa e pega ariba. E ehemplar aki ta crece den un sker di piedra. Segun un conocedor di orquidea cu DLVV a consulta e por trata di un simiya cu a germina ariba un mos cu ta crece ariba e baranca. Asina tambe DLVV a haya colonianan

di Brassavola cu ta crece eyerca ariba baranca. Por ultimo e ehemplar haya ta indica di ta crece for di alcanse di hendenan sin equipo. Den futuro cercano DLVV lo sigui controla e sitio pa posibel ehemplarnan, cual si wordo localisa lo indica cu e ehemplarnan aki ta natural.

Si encaso e Banana Shimaron aki a crece natural lo significa un aumento den biodiversidad grandi cu ta ofrece mihor posibilidadnan na especienan pa confronta peliger di extincion cu e Cambio Climatico por trece.

Alaves e por cambia su estado di *inmiddels verdwenen* pa *zeer zeldzaam* den e futuro Zakflora. Cu por yuda na haya proteccion legal por medio di un Ruimtelijke Ontwikkelingsplan cu Voorschriften pa e area. Eyden por regula e intensidad di recreo cu e lugar por carga. E baranca cu tin Brassavola ta crece ariba DLVV tin comprendi cu

hendenan sa usa pa practica subi piedra. Esaki por resulta den reduccion di e mos y consequentemente menos lugar pa un simia di orquidea germina.

DLVV a colabora recientemente ariba un proposicion pa establece un landsbesluit pa proteccion di especienan di flora y fauna cu ta den peliger di extincion. Esaki ta proteccion cu no ta mara na un espacio. Eyriba DLVV a nombra e Banana Shimaron, maske cu su estado ta *inmiddels verdwenen*. Simplemente DLVV ta kere cu hende por a faya di mir'e durante e recorrido pa e buki. DLVV a yega di haya ehemplarnan grandi di palonan scars cu otro conocedornan no a pinta ariba mapa. Tambe debi cu e mata ta den hopi jardin DLVV a haya cu e por a recolonisa su habitat di su mes.

Pa mas informacion email DLVV na info@santarosa.aw, of jama 5858102.